

America Baptist Church aading Pasion hong zatsak Zomi Khangno khat

Pasion khuavaak i san zawh, tu ma kum zakhat lai a ki pan, Pasion in ei Zomi te ih pianna Zogam pan in Kawlgam, Vaigam leh mun tuamtuam (**Regional**) ah hong puak khia hi. Hih bang a i ki thehthaang na pen tu ma kum sawmni kim aki pan hong tangzai (*a mimal leh a mun*, **Global**) semsem in, tu ni in leitung mun tuamtuam ah a ki zel khin phial ih hi ta hi. Tu ta dih in Pasion hong puak na na mun leh gam ciat ah ih bulkip theih nang in a hanciam lai a tam zaw i hi phial zong in, a bulkip khinsa ih mipih te zong damdam in hong ki behlap sem sem ta hi. (*A bulkip: ih tun na gam ciatah tua gammi te bangin pilna, siamna nei a, liangko kikim a, a nung ta zo te*). Gentehna in, USA gam sung bang ah, a gammi tampi te nangawn a ngah zawh mengmeng loh uh, Professor, Physician, Engineer, Lawyer, Nurse cih dan a, siamna tawh nasep (professional occupation) a nei te zong ei Zomi te sungah, hong om kiukiu ta hi. Lungdam huai mah mah ka sa a, ih minam bup aading in Pasion in thupha hong piak sak leh hong zatsak mi te hi ci in ka um hi.

Tua bang thuhaih te lak pan in, tu nai a thu piang khat kong gen nuam hi. America Baptist Churches te tawh a ki zom a hi, Exton Community Baptist Church, PA in August 01, 2011 ni a ki pan ih Zomi khangno khat ahi, Joseph Thang Cin Sum a Pastor ding un hong zatsak uh hi. A sep a ki pan tu ni ciang dong Pasion in ompih in, lawhcin na pia a, October 30, 2011 ni, nitak nai 3 in America Baptist Churches-USA (ABC-USA) te vai hawmna tawh Blue Bell khua, PA a om Grace Baptist Church ah ordination piakna hong neih sak uh hi. Rev. Joseph Sum pen Kawlgam sung pan ABC-USA te ordination piak na a ngah masa pen a hi hi. Tuma kum zanih kim a Kawlgam ah hong pai American missionary te a hi, Rev. Dr. Adoniram Judson (1813), tu ma kum za val deuh a Zogam ah missionary a hong pai a hi Rev.Dr. J.H.Cope te a ki pan sangmang tampi te hong ki piak khiat na hang in, Kawlgam minam tuamtuam te sung ah Pasion khuavaak hong tang in thu um mi tampi hong om khia hi. Tu ni in ih biak Pasion in ei khuavaak hong puak khia a hi America thu um mi te sung ah **Tuu cing** a sem kik ding in ih sanggam pa, Rev. Joseph Sum, hong zat sak a hih man in, Ama min i phat hi.

Rev. Joseph Sum pen tulaitak a Global Zomi Alliance (GZA) makaipi leh Tedim Baptist Church, Yangan (TBC-Y) i senior Pastor a hi Rev. Dr. S. Pau Khan En leh Sianu Zen Khaw Don te ta pa nihna a hi hi. Rev. Joseph Sum in Eastern University pan in M.Ed. leh Palmer Theological Seminary pan M.Div. degrees te a ngah hi. Eastern University pan mah in Health Services lam tawh M.Sc. zo a, Nurse a sem Anna tawh ki pumkhat na nei uh a, ta nei nai lo uh hi.

Rev. Joseph Sum i a Pawlpi ah a hunzat masakna hih a nuai a link pan ki ngai thei hi. http://extoncommunitybaptistchurch.blogspot.com/2011_08_01_archive.html Pasion in mai lam ah Rev. Joseph Sum a tang zaizaw in hong zat sak lai hen la, hih lai a sim ei te zong ei tatna mun ciatpan Ama min a thang sak zoding in thupha hong pia hen!

Lungdam pihna leh deihsakna tawh,

Thangboi